

LA USC DI LADINS – VENERDI' 18 GENNAIO 2013



La Usc de la scola

nr. 03 / 18 de jené 2013 **LA USC**
di Ladins

L'é miec stèr adum e scombater, che fèr acort!

L bec de la Scola de Fascia, stac en vijita a Napoli a cognoscer la sociazion Libera, enstadi i à portà dant sia esperienza a duc si compagnes



L bec de la Scola de Fascia endèna che i contèa de l'esperienza.

"I ne à insegnà che no l'é giust fèr acort, ma che enveze l'é miec se meter ensema e fèr zeche, descheche à fat la sociazion Libera". Chesta l'é demò una de la frases che se à sentù

te sala grana de la Sorastanza a Poza enstadi. Defat, dò l viac fat a Napoli en vijita a la sociazion Libera, endrezà tel projet "Waiting for Life" con la Risoia da la sociazion

Fassalux, i bec de la Scola de Fascia che à tout pèrt a chesta esperienza i à volù ge portèr dant a si compagnes l significat de chest viac.

Con la vertola che Alessio e Simona de la sociazion Libera da Napoli i é vegnui te Fascia, l'é stat endrezà doi radunanzes per la classes terzes, quartes e quintes una per chi del Lizeo Scientific e una per chi de la Scola d'èrt.

L'é stat contà e moscià tras n video che che l'é Libera e che che la fèsc. Con senta a Napoli, a Potenza, a Reggio Calabria, a Palermo, ma ence a Latina, a Modena, a Torin e a Milan, la sociazion nasciuda del 1995 la scombater contra la mafies e la se cruzia de formazion, de memoria e de bens touc ai clan.

Chi che laora o fèsc i volontadives per Libera i vel slarièr fora l'idea



L publich de studenc endèna la radunanza.

che no se cogn fèr acort, ma ge vel se meter ensema e proèr a scombater contra chest burt sistem de chesta organizacions crimineles. Se cogn se fermèr a pissèr e realisèr zeche de desvalif. Scombater contra l lurier en neigher, contra i morc "inozenc" e dut l sistem comanà dai clan.

L'é stat dit da Simona: "no l'é vera che i bec copé da la mafies per n fal, magari percheche i ge someèa a zachei de etres, i era tel post falà al moment falà. Ic i era tel post giust al moment giust, i era proprio olache i cognea esser. I era dò che i fajea sia vita".

Dò la reflexcion e i ejempies di educadores de Libera, la parola é passèda ai bec de la Scola de Fascia che, aldò del viac e de la scontrèdes dantfora, i se à portà a cèsa na valisc de emozions e sentiment che é

restèdes te ic e te sie cher.

I à contà: "Aon vedù che ai bec e ai joegn ge vegn portà dant na vita con valores deldut desferenc da chi che sion usé a aer nos e che per nos i é normal. Ge vegn insegnà che l'é più emportant vadagnèr e esser riches per poder se comprèr la plus firmèda, piutost che jir a scola e aer na istruzion. Aon vedù la perjons olache l'é ite n muie de joegn e aon cognosciù ejempie de joegn morc per n fal".

Ma apede a dut chest no podea esser demò roba burtes, percheche chel che più ge é restà a chisc joegn fàscagn a Napoli l'é stat proprio "l'aer vedù che duta chesta jent se à metù ensema e la é dò che la laora e la se dèsc jù per n problem che no l'é da pech". N insegnament segur de ütöl ence per duc nos e te ogne setor de la vita. (vr)



Alessio e Simona de Libera Napoli.